

## Stellignahm zum Fäschtbricht ZSJV-Jodlerfäscht Sarne 2015

- Ja, über ne so ne Fäschtbricht cha mer sich eifach nur freue! Mit 58 vo 60 mögliche Pükt, hämmer eus gägenüber vo Davos um vier Pükt chönne verbessere.
- Es ganz grosses Komplimänt a euch alli, jede und jedi hed zu dem Superergäbnis bytreid.
- Wenn de Gsamtydruck genau mit dene Wort beschribe wird, wie-n-i euch bim Probe jewyls gseit ha: „Es mues s'Publikum begeischtere, berüehre, d'Freud mues spürbar sy, mer mues euch chönne glaube was ihr singid“, denn isch das s'gröschte Komplimänt und Bewys, dass mir musikalisch uf em richtige Wäg sind.
- Ihr händ's chönne umsetze, dass de Vortrag bim Publikum (das hed mer scho während em Singe gmerkt) und de Jury genau e so aacho isch, wie mir's beabsichtigt händ. (Gesamteindruck im Bericht lesen).
- „Feinste Detailarbeit wird geleistet“, das bruuchts für ne sones Resultat und das beschrybid denn alli andere Sparte vo däm Bricht: Tongebung, Aussprache, Harmonische Reinheit, Rhythmik, Dynamik.
- Wenn ihr de Bricht i aller Rueh nomal studierid, de verstöhnd ihr vielleicht no besser, werum ich mängisch uf einzelne Stelle umeryte und eifach nid lugg lah bis es guet isch.
- Alles, won-i bis jetzt gseid ha, hed mit Singe, Notewärt, Üebe, Disziplin und Schaffe (Probe- und Detailarbeit) z'tue. Doch das isch nur *ei* Syte vom Goldvreneli.
- Die ander isch äbe so wichtig. Die wärtschätzendi Kameradschaft i eusem Klub, wo sones „Zäme-öppis-Erarbeite“ überhaupt möglich macht. Au da treid jede und jedi Einzelni dezue by.
- Allne voraa und mit beschtem Vorbild, du, Alfons, wo das Vereins-Schiff uf wunderbar subtyli Art leitisch. Und du hesch tatchräftigi Vorstandskollege und d'Wilma, uf die du chasch zelle.
- Under settigne Bedingige machts unglaublich Freud, musikalischi Leiteri vom Heimelig Baar z'sy.
- I dem Sinn startid mir jetzt zu de letschte Etappe zum Herbst-Konzärt 2015.

Ich danke euch allne ganz herzlich und wünsche euch wyterhin viel Spass und Freud am Jodelgsang!

Euri Dirigäntin, Maria

Sins, 25. August 2015